



Extrait de la revue **SingulierS** du 1^{er} trimestre 2012

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : **Éditorial**

« Fèvrî, lè ptit mwès, lè pus dèr dèr mwès » ! Bin ây ! Gn-ôrèt toudi d' l' iviêr, môgré k' lès sincieûs prêchèt l' rastchôfmint dul tère. Adon avè lès dègrés ki bachèt si fwârt, jusk' a mwins' 20 °C, lès pris dèr moyins d' tchôfadje créchèt èt l' mazout rufwèt côzer d' li : toudi pès tchîr, jusk' a arivé a in chife rucôrd... K' i srè chûr co batè ! Nosse fidèle lîjeûs Èrnès', nous-è adon avoyé in bokèt d' sêzon, kë djè v' propôze dè lire :

Lès pètros-dolârs

Ou cminçmint dèr ènéyes 70, lès Ètats-Unis imprimint èt dèpansint brâmint dpus d' biyèts vèrts kë l' ör k' il avint.

Kékès ènéyes pès tôrd, la France avot dmandé l' rambousemint, an ör, dè stoc k' èle avot atasséye an dolârs. Mês tintin !!! Lès U.S.A. ont dit niète, i n' avint pès assez d' ör pou covrè lès biyèts vèrts k' il avint imprimés èt dèpansés dins l' monde ètîr !

Èt c' èst pou ça kë lès Ètats-Unis ont conclu in martchî avè les Èmirats « OPEP » ki s' agadjint à vinde leû production d' pètrole an dolârs amèrikin.

A pôrti d' adon, tous lès payis k' achtint dè pètrole dèvent avèr dèr dolârs amèrikins, û don bin 'nn-achter conte dèr bins û dèr sèrvices. Ç' côp la, lès U.S.A. n' avint pès k' a imprimer...

Ça fwèt k' lès Ètats-Unis mintnint insi artificièlmint la valeûr comèrciâle dè leûs dolârs èt s' fournichint, côzi pou rin, an pètrole pa l' djeû dèl plantche a biyèts.

Pourtant i gn-è yink k' è foutu in côp d' pîd ou sistin.me !... Mês i l' è payé tchîr, min.me dè sa vîe ! C' èst Saddam Hussein. Il è kmincé a vinde lè pètrole d' Irak an eûro. Ouy, ouy, twè ! Ké crime dè lèse madjèsté ! Ké bafe al gueûye da Bush ! K' è dè côp dmandé rèparâcion : « haro su l' bôdèt » !

Pou djustifier ène guère conte l' Irak, lès U.S.A. ont trovè kë l' Irak avot dèr « conivances », dins l' atake dèr toûrs, lè 11 dè sètambe ; kë l' Irak avot dèr stoks d' ârmes èt djè n' tè sé pès cwè... Il ont adon ataké l' Irak, touwé Saddam èt kèrè après dèr-ârmes ki n' ègzistint nin, pask' i n' ont jamwès rin trovè !



L'Irak nêtiéye, lès novês dirigeants mêtês an plèce pa lès USA, ont rêvnê ou sistin.me dè vante an dolârs.

Ou Vènèzuèla, lè prèsidant Hugo Chavez è ossi kmincè a vinde sè pètrole conte dè-s-ôtes manöyes. Lè malèrêûs è sté mwint' côps victime dè sayes d' atantas èt dè rèvièrsmint d' rèjime. Mwint' dè cès agrècions la sont a mète sè l' conte dèl CIA.

Lè chef d' ètat d' Iran Ahmedinedjad, an bon rwêtant, è volu fwêre pè fwârt ; il è vindu s' pètrole conte toute manöye, sôf an dolâr ! Lè ptit djeû dèl plantche a biyèts vèrt toutche a sa fin. Lè djoûr kè lès-Ètats pöront payer avè leû prope manöye, lès mambes dè l' OPEP këminçront a lêcher tème l' dolâr amèrikin.

La pîre situwâcion ki pörot ariver ôs amèricains, ça sèrot d' avèr a payer come lès-ôtes lè pètrole an Euro, al plèce d' imprimer dè biyèts vèrts.

Ernest BENOÎT (Villance)